

Yogayayimsü den sendaktepa mali: Dr. Seyiekhrietuo John

Kohima, Aami/June 21 (TYO): Alima den liromedema June 21 nü Nagaland nunga state tesem ajaklen International Day of Yoga anogomong sentong ayongzüka mongogo, aser tongti sentongji Indira Gandhi Stadium, Kohima nung agia liasü.

Kohima nung ayongzüka sentong nung department balala nungi, shisaliok rejutem nungi kaketshirtem aser public noklang aika adenshia iba sentong nung shilem agi.

National Ayush Mission Nagaland kübok Department of Health & Family Welfare-i Department of Youth Resources & Sports den senteper "Yoga for One Earth, One Health - Yoga Sangam" omen nung ajemdaker iba sentong ayongzüka liasü.

Health & Family Welfare Minister, P. Paiwang Konyak aser Youth Resources & Sports Advisor, Keoshu Yimkhiung na den sorkar tongti ketdangsertem, kaketshirtem, NCC aser NSS züngsem aikati yoga tesayurtem leniba kübok Yoga exercise agi.

Iba sentong nung jembidang State Programme Officer (AYUSH), Department of H&FW, Dr. Seyiekhrietuo John-i, "Yoga ya tamangba yimsü kecha den-a sendaktepa mali; iba ya ajaklen benshiba ka lir. Meimchirtem temang anema alitsü atema iba ya ajaki benshitsü akok," ta ashi.

Khristan nütüsung teimba aliba state ka nung, Yoga ya Hindu nungertemi benshiba lir, ta aikati bilemba dak sendakba nung Dr. John-i iba olen ya jembi.

Kohima Court nungi temesepba mozü auyar tongti puogo

Kohima, Aami/June 21 (TYO): Kohima nung Prosecution Inspector (PI) Court indang Malkhanna (kuli rizüngba takdang) nungi temesepba mozü auyaba ken o nung temelung melemi alir tongti ka Kohima Police-i puogo, ta Honibarnü police-i metetdaksü.

Kohima court nung temesepba mozü ayuba sülen ita asem jungnüa arudang police-i melung melemi aliba tongti nisungji puogo, ta Addl. SP & PRO Kohima Police, ta K. Soriso-i Kohima nung osangbenertem senden ka nung metetdaksü.

"March 22, 2025 anepdang züngia 1:00-2:00 ako tsüngda mejangjaba nisungtemi heroin asütsüa

akok, ta bilemba touzük gram 675 ji soap case 45 nung yua aliba auyaa liasü. Tang court nung tangadak ken otem nung iba ya tongtibang kuli liasü," ta pai metetdaksü.

Court telungi aden-a ozüng alema itettsüsa atalokba sülen Kohima police-i iba ken o ya bushisüngdang tenzüka liasü, ta paisa metetdaksü.

Tasa balala amshia bushisüngdangba sülen tesüsa ketdangsertemi June 13 nü arrshi kum 28, Kevichutuo Cüze puogo, ta pai metetdaksü.

Iba mapang nungjagi tenzüka Cüze judicial ket nung lir aser maneni legal tsütsülen nungi inyaksangshidar, ta paisa shisem.

Dimapur nung lanur ka gari telung nung sür lia angu

Dimapur, Aami/June 21 (TYO): Honibar nikongdang Dimapur nung Power House Colony, Full Nagarjan kiyong nung arrshi kum 30 dak tali lanur ka gari telung nung sür lia angu.

Asürji Mokokchung district nungi Sashi lir ta osang angazüker. Paji Maruti gari nung driver menden nung amenba dang masü saka 'seatbelt'-a alenloker sür lia süisüponger kati tama angu.

Osang angazükba agi, Sashiba ji Dimapur nung aliba

BSNL office nung inyaker aser pa chiyungi ayazükba sülen mapang tatsüka dang lirbo süadok südi.

Iba osang zülü tashi nungbo pa kechi kuli ajanga asüar mejangja, ajisüaka mezüng bushisüngdangba ajangabo shinga dak-a melung malemtsüsa masü saka 'stroke' süa asü südi ta bilemer.

Tesülen iba osang angashia police iba tesem jagi arua tasü mangji District Hospital Dimapur -i bener ao.

KMC office kakpoka tur auyasang Kohima Police-i puogo



Kohima, June 21, 2025: Tai tonglokja alisang, Kekietuo'er kidang nungi apubatem Kohima SP Office kima sayaba noksa nung angur.

Sl. No	Case Reference	Date	Location	Estimated Loss
1	North PS C/No. 0040/23	14/08/23	Baptist College, Kohima	` 45,00,000
2	North PS C/No. 0009/24	27/01/24	D. Khel, Kohima Village	` 22,50,000
3	North PS V/No. 0038/24	11/04/24	Oriental College, Kohima	` 35,000
4	North PS C/No. 0055/24	02/07/24	Kohima College	` 3,00,000
5	North PS C/No. 0076/24	13/11/24	Nexa Showroom, Meriema	` 38,000
6	North PS C/No. 0078/24	29/11/24	Vuto Motors, Kikha Colony	` 4,59,700
7	North PS C/No. 0004/25	03/02/25	North Treasury, Kohima	` 1,80,000
8	North PS C/No. 0017/25	24/03/25	Entrepreneurs Dev. Agency, Kohima	` 10,83,941
9	South PS C/No. 0006/25	08/05/25	BOC, Mato Complex, PR Hill	` 69,000
10	North PS C/No. 0028/25	01/06/25	Okusa Toyota, Kohima	` 2,13,150
11	North PS C/No. 0029/25	03/06/25	KMC Office	` 95,00,000

Kohima, Aami/June 21 (TYO): Tan ita tetenzüklen Kohima Municipal Council (KMC) Office nung sen crore 1 jungnüa auyaba tatalokba densema Kohima tesem balala nung auyaba tatalokba aika bushisüngdanga aruba sülen tesüsa Kohima police-i auersangji puogo aser auer jagia pai aibelenba nangzükogo, ta Honibarnü police-i metetdaksü.

Tai tonglokja alisangji Kohima nung alir Kekietuo lir ta jangjaogo. Pa apuba sülen pai 2023 kum August ita nungi tenzüka Kohima tesem balala nung auyaba tatalokba 11 nung shilem agiba nangzükogo.

June 21 nü Superintendent of Police office, Kohima nung osangbenertem den jembidang Additional SP & PRO of Kohima Police, K Soriso Quinker NPS-i, June 3 nü KMC office nungi sen aika auyaba tatalokba

bushisüngdangtsü atema Special Investigation Team (SIT) ka tenteta liasü, iba sülen team jagi aibelener putettsü atema advanced forensic tools balala amshiba den külemi digital surveillance aser human intelligence amshia hopta ana dak tali kanga meranga bushisüngdanga aruogo, ta metetdaksü.

Kohima Police-i ashiba agi, KMC Office nungi sen aika auyaba sülen tai tonglokja alisang jagi sen aika indokba ajanga pa dak melung malemtsüsa aküm.

Tesüsa Kekietuo apu aser pa dang asüngdangyaba mapang nung pai sen ajak senteper crore 1.5 shi auyaba nangzükogo, ta police-i metetdaksü.

Additional SP-isa, "Tauyaba sen, talisa KMC Office nungi sen aika auyabaji bushidar. Tai tonglokja alisangi ashiba o nung ajemdaker senji bushidar. Ken o

11 ji dang masü saka tai tonglokja alisang jagi ano iba dak tali auyar asütsüa akok ta police-i melung melemi bilemer," ta metetdaksü.

Superintendent of Police, Kohima, Teisovise Metha NPS-i sangdong ka ajanga Special investigation team-i anibelem arema kanga meranga inyakba atema tenünsang agütsü.

"Iba takok ya Kohima police-i sempet amshia nendaka inyakba kuli lir. Ozü team den külemi forensic analysis aser akhidang nungi benshia aruba bushisüngdangba tasa balala ajanga tai tonglokja alisang puogo. Kohima Police-i maneni sensotem kumzüksü atema inyaksü," ta kasa sangdong ajanga metetdaksü.

Tang Kekietuo ya police ket nung lir aser pa anema ken o akatsü atema inyaksangshi tenzükogo.

AYO-i Kohima nung taxi permits mita repringtsü

Kohima, Aami/June 21 (TYO): Kohima nung gari tali senzüba ajanga timtem ajuruba aser Kohima district nung taila taxi permits aser transfer agütsüba tebilemtsü lemsatapa Angami Youth Organisation (AYO)-i June 24 anogo nungi tenzüka anogo pongnunü tashi taxi permit mita repringtsü, ta sangdongogo.

Old Ministers' Hill, Kohima nung AYO office nung osangbenertem den jembidang AYO Tir Kesosul Christopher Ltu aser general secretary,

Neidilhoutuo Neibu Sechü na leniba nung AYO ketdangpurtemi, 2022 kum June 6 nungi tenzüka sorkari taxi permits tasen agütsüba nokdangogo, ajisüaka tesüba kum asem tsüngda taxi permit 300 dak tali agütsüogo, ta

metetdaksü.

AYO-isa, Kohima nung aliba Regional Transport Office (RTO) nung tim mesüi benshiba aser inyakyim teladak masüba atema tebilemtsü akar, ta metetdaksü.

Parnokisa, taxi permits verification drive agiba nükjidongji inyakyim shidakleni aotsü, permit taila mesüra transfer asüba permits'ar metettsü aser permit shidak alirtem dang senzütsü atema temelaba agütsütsü asoshi lir, ta metetdaksü.

"Onoki RTO, district administration aser traffic police den-a jembishinüogo. Iba ya ozüng benoker ka masü saka transport system tajungba akümtsü aser yimti nung gari masemba tebilemtsü bentettsü asoshi amalitepa inyakba

maparen ka lir," ta AYO ketdangpurtemi metetdaksü.

AYO joint secretary aser Taxi Verification Drive committee nung züngsem, Vipu Zashümo-i, verification drive ji June 24 nungi June 28 tashi anepdang shia 9:00 ako nungi AYO office nung agitsü, ta metetdaksü.

Taxi kiburtem ket nung Aadhaar card aser Vehicle registration papers alitsüla aser driver ket nung driving license aser Aadhaar card alitsüla, ta AYO-i metetdaksü.

AYO ketdangpurtemisa, tim ketdangsertem den jembishinüba sülen ang verification drive ya agir, aser iba mapatong ya taoba mapang aser tang teinyakdak Deputy Commissioner tem, RTO Kohima aser traffic police-ia pusemer, ta metetdaksü.

Nagaland tesem balala nung 11 buba International Day of Yoga amung

DIMAPUR:



Dimapur, Aami/June 21 (TYO): Alima tesem ajunga den külemi Nagaland nunga district ajunga nung June 21, 2025 nü 11 buba International Day of Yoga mungogo.

DIMAPUR:

Dimapur nung 11th International Day of Yoga ya Dimapur Government College nung Dimapur District Administration den lungjemer alima ajunga nung omen "Yoga for One Earth, One Health" nung ajemdaker munga liasü.

Sentong nung Dr. Vinyuhu Lhoungu, Associate Professor and Coordinator of IQAC, Dimapur Government College menden liasü aser Biswajit Sarkar, Associate Professor, DGC, ajanga International Day of Yoga indang mangdang aser inyakyim tongmelang agi rasaa ashi.

Iba sentong nung Deputy Commissioner, Dimapur, Dr. Tinojongshi Chang, NCS ajanga jembidang, nisung ajak temang aser tekolok anema alitsü nükjidong nung iba sentong ayongzüük ta ashi aser anogoshi inyakyim nung Yoga

yimyatem densema amshitsü ayongzüük.

Mapang kabo yoga ya tamangba yimsü ka den sendaktepa lir ama angatet, saka tangbo ibai alima ajungai amshir, ta pai ashi.

Yoga ya India nung kisüng masü saka alima ajunga nung benjonger aser teti yoga yimyatem amshiba ajanga temang anema yutsür aser tekolok shisatsü tali saksalemer, ta pai ashi.

Kasa mapang DGC ajanga iba sentong ayongzüükba aser Marwari Yuva Manch ajanga refreshment agütsüba atema pelaba lemsatepa liasü.

Iba sentong nung Heads of Offices, sorkar department balala nungi staff aser tesayur aser kaketshir temi shilem agia liasü.

KOHIMA:

Kohima nung International Day of Yoga ya Jawahar Navodaya Vidyalaya (JNV), Kohima nung Kohima District Administration ajanga Jawahar Navodaya Vidyalaya, SANKALP - District Hub for Empowerment of Women aser

SAKHI - One Stop Centre, Kohima den lungjemer agizüka liasü.

Iba sentong nung school students, tesayur, district ketdangsür aser department balala nungi shilem agia liasü.

Principal Mahesh Prasad Shivjare-i pela agizüükba o jembi aser EAC (Probationer) L. Yantsohung Lotha-i alima tesem ajunga nung yoga ayongzüka agiba indang lemsatepdang yoga ya Sanskrit tera yuj nungi adok aser iba tetetzü adentsü mesüra lungjemtsü lir ta ashi.

June 21 ya International Day of Yoga asütsü India-i benoka United Nations General Assembly nung 2014 küm agizük, ta pai ashi.

Alima ajunga nung iba anogomung ya 2015 küm mezüng amung aser iba mapang New Delhi nung otsü yanglua mass yoga session ka ayongzüka liasü, ta ashi.

ZUNHEBOTO:

Zunheboto nung 'Yoga for One Earth, One Health' omen nung ajemdaker 11 buba International Day of Yoga ya

District Sports Office ajanga MYBharat den lungjemer Indoor badminton stadium, Zunheboto nung ayongzüka liasü.

Programming Officer, MyBharat, Zakato L. Zhimomi-i iba anogomung teratet ashi aser District Sports Officer, Zunheboto, Anguvito Ayemi-i yoga ajanga temang nung tajangzüük anguba indang lemsatep.

Teisiakpe, PIS Sports Officer, Zunheboto lenisüba nung yoga sessions ya agia liasü.

Iba sentong nung Deputy Commissioner, Zunheboto, Dharam Raj-i anir district administration, Superintendent of Police aser police personnel, heads of departments, Zunheboto Government College, Cornerstone Higher Secondary School aser Sacred Heart School, Zunheboto nungi kaketshir temi shilem agia liasü.

WOKHA:

Wokha District Administration ajanga Department of Youth Resources & Sports, Department of Social

Welfare (under Mission Shakti and BetiBachaoBetiPadhao), One Stop Centre Wokha, Bharat Scouts & Guides (Wokha Unit), Nehru Yuva Kendra, National Service Scheme (NSS), aser 24 Assam Rifles den lungjemer International Day of Yoga ya ayongzüka liasü.

Sentong nung Anuranjan Singh menden liasü aser Youth Resource Officer Libemo Jami ajanga yoga ajanga tajangzüük anguba indang lemsatep.

Iba sentong nung Deputy Commissioner, Wokha, Vineet Kumar, IAS ajanga nüburtem dang yoga ya tamangba yimsü ka ama masü mebilemtsü ayongzüka liasü.

Maneni Raju Kumar-i anir yoga demonstration session agi aser District Welfare Officer, Wonjano Enny-i melepzüng o jembia sentong tembang.

Kasa anogomung ya Meluri, Phek, Shamator, Noklak, Kiphire, Tseminyu aser Medziphema nunga district administration-i lokti tentet balala den lungjemer munga liasü.

Jakhama nung gender sensitivity training agi

Dimapur, Aami/June 21 (TYO): Yimtsüng nung lenirtem aser Anganwadi worker tem atema anogo ka asoshi gender sensitivity training sentong ka June 21 nü CDPO office, Jakhama nung agiogo.

Iba training sentong ya Beti Bachao Beti Padhao (BBBP) sentong kübok Kohima District Administration aser SANKALP-District Hub for Empowerment of Women (DHEW), Kohima nati longjemer ayongzüka liasü.

Sentong ya atsüapong tebandang maliba indang tangazükba agütsütsü aser atsüapong dak ajemkdaker mezüngmeshia amshibatam tekübokba jenjang nungi nokdangtsü nükjidong nung

ayongzüka agiogo. Iba sentong ya Gender Specialist, DHEW, Kohima Vikeduoze lenisüba nung agia liasü.

Area Coordinator, NSRLM, RD Block Jakhama Sokhrienuo Rupreo-i, Gender equality onük nung ajemdaker jembi. Lai, atsüapong mebendangi ajak nem kasa maongka aser temeden agütsütsü nüngdakba lemsatepba den yimtsüng nung inyakertem dang pei lokti nung ajak anisemer inyakba yimya tajung benoka benshitsü ajungshia liasü.

Child Development Project Officer (CDPO), Jakhama, Zubemo Jami-i, tanurtem kibong kümdaktsüba nokdangtsüba indang onük nung ajemdaker jembi. Pai tanurtem anojungi

kibong kümdaktsüba ya lokti nung tebilemtsü ken o ka, koba ajanga aiür aser asangur chanutem terenlok nung tetsükdaktsü adokdaktsür aser iba ya parnok temeden anema lir, ta ashi. Prohibition of Child Marriage Act 2006 idang metetdakja pai, ken o dak sendaka alir ajak dang kümküma alitsü aser iba amala inyakyim ya bushiteta nokdangtsü mepeshia liasü.

Atsüapong dak sendakba nung inyakyim tongtibangtem nung community-level nung inyakertem shilem akangshidaktsütsü aser sorkar scheme tem shitak benoka tetsür aser tanurtem ajangzükdaktsütsü nükjidong nung iba training sentong ayongzüka agiogo.



Kohima district nung June 21 nü merekmeju sentong ka ayongzüker inyakba mapang Governor's Secretariat, Raj Bhavan Kohima-ia Raj Bhavan kima merekmeju sentong ayongzüka agiogo.

Cooperation deptketdangsürtemworkshopaka

Dimapur, Aami/June 21 (TYO): Cooperative Societies, Kohima Registrar office nung June 19 aser 20 nü ta anogo ana leadership workshop ka agiogo.

Iba workshop ya mezüngbuba anogo Department of Cooperation, Government of Nagaland nung SRCS aser iba tema nung aliba officer tem aser Head Office nungi ministerial staff tem atema ayongzüka agiogo.

Mezüngbuba anogo Commissioner & Secretary, Department of Cooperation, Orenthung Lotha alakteta joker liasü. Sentong nung o jembiba mapang pai Nagaland nung cooperative movement tashi itshidaktsütsü atema lenisüba tashi tait, ethical governance aser tarutsü atema tasa tajungtem nüngdakba lemsatepa liasü. Paisa, department ketdangsürtem dang tarutsü atema nükjidong tajung apiteta ayutsü nüngdakba lemsatepa liasü.

Workshop nung technical sessions pezü liasü. Mezüngbuba anogo Conduct, Discipline & Appeal Rules dak sendakba nung Lithrila Under Secretary P & AR-i jembi, sorkar tenzükertem khuret indang Asalie Lese, Dy. Secretary, ATI-i jembi, Meripeni Zares, Under Secretary Home-

i officers tem atema Soft Skills indang jembi aser Dy. Secretary, Economics & Statistics Rhonthungo-i office procedure tem indang jembia liasü.

Tanabuba anogo "Visioning for the Next Decade" omen dak ajemdaker Panel Discussion ka liasü. Sensaksemba onüktem rongnung audit mechanisms akangshitsüba, inyaksanghi mesüi aliba cooperatives tem de-register sütsütsüba, cooperatives tasentem organize süa züngoksemtsüba, tanga department aser lokti tentettem den longjemtsü asoshi ajungkettsüba aser tangar dak memetalokba cooperative society tem tenzüktsütsüba amala densema liasü.

Iba sentong ya audits taila agintsüba, züngsemtem jangjashitsüba aser cooperatives tem startups aser entrepreneurs tem den sendakteptsütsüba amala jenjang agitsü asoshi mulungtepa sensak asema sülen tembanga liasü.

Workshop nung shilem agirtemi, cooperative sector temelenshi atema tangazükbatem aser tasatem kobasa sensaksemogo, item ajak ya benoka inyaktsü asoshi bendanga agütsür aliba lemsatepa liasü.

11buba International Yoga Day sentong nung aikati shilem agi



June 21, 2025 nü Visakhapatnam nung 11buba International Day of Yoga anogomong sentong nung Ato kilonser, Narendra Modi-i shilem agiba noksa nung angur.

New Delhi, Aami/June 21 (Agencies): Honibarnü India nung dang masü saka alima tesem ajaklen nisung aikati 11buba International Day of Yoga sentong nung shilem agiogo.

India nung International Yoga Day anogomong tongti sentongji Visakhapatnam nung agi. Visakhapatnam tzyimkümlen kilometer 26 tashi nung Ato kilonser, Narendra Modi leniba nung Yoga sentong agia liasü.

Andhra Pradesh kübok Visakhapatnam nung International Yoga Day sentong nung nisung teimtibai Surya Namaskar (sun salutation) shilem agiba ajanga Guinness

World Record tasen ka videos social media nung yanglutetogo, ta lemsatepa liasü.

China yimtiba, Beijing nunga Indian Ambassador leniba nung Mysuru Palace nung nisung 15,000-i yoga exercise agi. 11buba International Yoga Day anogomong sentong nung jembidang Ato kilonser, Narendra Modi-i, "Tia makai tanü alima tesem ajaklen tarendak tensa lir aser region aika nung tensa mejungi lir. Iba ama tensa mapang nung yoga ajanga asenok dang tesünep lenmang sayur. Meimchirtem tangu sashitsü, liromedemtsü aser tanaben abensatsü nüngdaker aser iba atemaji yoga ya 'pause button' ka lir," ta ashi.

Delhi nunga Supreme Court complex nung ayongzükba yoga sentong nung Chief Justice of India (CJI) leniba nung aikati shilem agia liasü.

Bollywood actors aser saisapongertem-a aikati yoga shilem agia parnok pusemer/sapurtem ajungshitsü atema yoga exercise agiba noksa aser

videos social media nung lemsatepa liasü.

China yimtiba, Beijing nunga Indian Ambassador leniba nung Mysuru Palace nung nisung 15,000-i yoga exercise agi.

11buba International Yoga Day anogomong sentong nung jembidang Ato kilonser, Narendra Modi-i, "Tia makai tanü alima tesem ajaklen tarendak tensa lir aser region aika nung tensa mejungi lir. Iba ama tensa mapang nung yoga ajanga asenok dang tesünep lenmang sayur. Meimchirtem tangu sashitsü, liromedemtsü aser tanaben abensatsü nüngdaker aser iba atemaji yoga ya 'pause button' ka lir," ta ashi.

Iran linük nungi India nunger 517 anir aruogo: MEA

New Delhi, Aami/June 21 (Agencies): Honibarnü Ministry of External Affairs (MEA) otongdar, Randhir Jaiswal-i, tang tashi nung Operation Sindhu kübok Iran linük nungi India nunger 517 anir aruogo, ta metetdaksü.

Jaiswal-i X ajanga, Turkmenistan kübok Ashgabat yimti nungi tanep tayimtsü ka ajanga India nunger aika New Delhi tonga anir aruogo, ta metetdaksü.

"Operation Sindhu maneni agir. Ashgabat, Turkmenistan nungi special flight ka nung Iran nungi India nunger aika June 21 anepdang 3:00 ako nung New Delhi tonga anir aruogo. Ibaji densemabo tang tashi nung Operation Sindhu kübok Iran nungi India nunger 517 anir aruogo," ta pai X ajanga metetdaksü.

Tang Israel aser Iran na tsüngda rara tamajungba akümba mapang Operation Sindhu kübok India nunger maneni kidangi anir arur. Tehra n nung aliba Indian Embassy aser Ministry of External Affairs (MEA)-ia iba maparen nung yaritepdar.

Iranian Embassy nung Deputy chief of mission, Mohammad Javad Hosseini-i, India nungertem anitettsü atema Iran-i akokba tashi India ketdangsertem den yaritepdar, ta ashi.

Paisa, nüngdak dang süra ano tayimtsü tali achaayangtsütsü, ta metetdaksü.

"Tanga linüktem ajanga mesüra Iran nungi indangindanga meyipa oner India nungertem tayimtsü mesüra gari ajanga anir aotsü

asoshi onoki yariteper," ta pai metetdaksü.

India nunger Zaffar Abbas Naqvi-i, "Iran nung tensa tamajungba akümba sülen ozü kibong züngsemtem ki telung nung dang liasü, iba sülen Mashhad-i jena ao, ajisüaka iba yimtia amak. Onoki India sorkar den tongtepratepba sülen tekeraba nung teyari anguba atema onoki pelar. Ni Ato kilonser Modi aser (Uttar Pradesh CM) Yogi dang pelar," ta ashi.

Iran nungi mezüng India nunger kaketshir 110 anir arua liasü; parnok rongnung Kashmir nungi kaketshir 90 densema liasü. Parnokji tamasa Iran nungi Armenia-i gari ajanga anir aoba sülen yang nungjagi tayimtsü ajanga Delhi tashi anir aru.

Odisha nung tzümetsüng agi nisung 50,000 dak tali kongshiogo

Bhubaneswar, June 21 (Agencies): Odisha nung Subarnarekha ayong nung tzyü tali metsünga ayimba ajanga tzümetsüng agi Balasore district kübok yimtsüng aika kongshiogo.

Honibarnü kidanger state Jharkhand nung tzunglu sashia aruba sülen ayong nung tzyü tali mobanga ayimba ajanga Odisha kübok yimtsüng aika nung tzümetsüng agi nisung 50,000 dak tali kongshiogo, ta district administration-i metetdaksü.

District administration-i kümzükba maparen tenzükogo.

Tzümetsüng agi block asem- Bhograi, Baliapal aser Basta den külemi Jaleswar Notified Area Council (NAC) kübok gram panchayat area 17 kongshiogo.

District ketdangsertemi ali kanga nemzuka aliba tesemtem nung alirtem dang kanga kümküma alitsü, aser tzümetsüng tensa tamajungba dang kümra anasatiba cyclone shelters-i oa jenoktsü metetdaksüogo.

Balasore District Collector, Suryawanshi Mayur Vikas-i block development officers (BDOs) aser tehsildars dang tensa tamajungba kümra nüburtem aienshidaktsütsü

atema renema alitsüla, ta tetuyuba agütsüogo.

Paisa ketdangsertem dang iba tensa mita alitsü aser tzümetsüng agi kongshiba ajanga timtemertem yaritsü tetuyuba agütsü.

Iba dak alia BDOs dang tzümetsüng agi kongshiba nüburtem nem chiyungtsü takong lema agüjang ta tuyu.

Chief district medical officer (CDMO) danga nüngdakba mozü peria rizünga ayutsü aser medical service agütsütsü atema renema alitsü tuyu.

Superintending engineer (irrigation) danga Chandil Dam indang gates ajak reprangshitsü aser methitemi tzyü level mita alitsü tuyu.

Civil supplies officer (CSO) danga chiyungtsü peria renema alitsü tuyuba den külemi sodi meshia aliba staff tem sodi thinenttsütsü tuyu.

District Emergency Office ajanga ashiba agi, Rajghat nung aliba Subarnarekha nung tzyü level terabo ajema kümдар, ajsüaka tang tashi metre 11.9 lir, ta metetdaksü.

"Ayongbanglen Jharkhand nung tzunglu aruba terabo süngjemogo, anungji ayong nung tzyü ajemtsü ta onoki imlar," ta ketdangser kati metetdaksü.

J&K nem state jenjang magütsüra SC dangi aotsü: Farooq Abdullah



June 21, 2025 nü South Kashmir nung Jammu & Kashmir National Conference party Tir, Farooq Abdullah-i osangbenertem den jembidang tangokba noksa nung angur.

Srinagar, June 21 (Agencies): Jammu & Kashmir nem tanaben state jenjang magütsüra Jammu & Kashmir National Conference party-i Supreme Court ajurua temepishiba ken o agütsütsü, ta Honibarnü NC Tir, Farooq Abdullah-i metetdaksü.

South Kashmir nung party nung inyakertem ajuruba sülen osangbenertem den jembidang taoba mapang J&K Chief Minister Farooq Abdullah-i, "Onoki atadar, ajisüaka parnoki (Centre) mapang talangka agira onoki Supreme Court dangi aotsü," ta metetdaksü.

"Elections agiba sülen nüburtemi tekeraba nung

tebilemstü onüktem bentetdaksüner, ajisüaka state jenjang tanaben magütsüba agi onoki tetsükdaktsü ajurur," ta pai ashi.

Paisa, "NC tangatetba memelenshi. Onoki democratic inyakyim benshitsü aser tesünep nung raratsü. Ajisüaka onok nem maneni yimtenren temeden magütsüra onoki ola madoki dangbo malitsü," ta metetdaksü.

Tan hopta tetenzüklen Pulwama nunga party nung inyakertem den jembidang pai, Jammu & Kashmir atema state jenjang meshiba ya maongka ka masü saka linük temzüng kübok temeden ka lir, ta metetdakja liasü.



June 21, 2025 nü Kolkata nung West Bengal State Rural Livelihoods Mission (WBSRLM) nung inyakertem mapa nung shimokba shidi agüjang, ta takhangba agüja longkak aitdang tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, JUNE (AAMI) 22, 2025

Shisatsü temerük

Asenok jembishinü aser inyaksangshiba yimyayimpong agi asenok mulungjang sayur. Tetezü, asen mulungjang mesüra mulungsentsü memerüki tamajung dang bilema lira, asenoki tangar daka tamajung dang reprangtettsü. Ibayongji, Yisui asenok dang Luke 6:42 nung asenok tenük nung aliba anak tama endoker külenang tangar tenük nung aliba anak reprangtsü ajungshia lir. Atangji, asenoki tenük agi angur saka asen mulungjang nung kechi bilemer iba amaji dang asenoki reprangtettsü. Aji oda, asenok mulungjang memerüki lira, asenok tenük agi tangar dak tajung aliba mereprangtettsü. Ajisüaka, kadang asen mulungjang merüka lidir asenoki tangar dak tajung aliba reprangtettsü aser tangar indang tamajung mebilemtsü. Tenyar Paul-i pa den külemi Tsüngrem wadang nung temulung ka ser inyaksang Tita dangi züluba shiti nung, " Temulungsentsü merüka alirtem atema ajak temerük asütsü saka temulungsentsü memerüker aser mamangba purtem tsüngdang ajak memerük asütsü, kechiyong parnok shisatsü aser temulungjang memerük lir," ta Tita 1:15 nung shia angutsü. Kodang, asenok mulungjang nung tajung bilemer, asenoki tangar anema mebilemer aser tangari tamajung bilemyonga asenoki item tamajung melena tajung agütsütetter. Tangar majung masukba aser tangar nüngsen mejembiba tebang temeliji shisatsü temerük adenba purtem dak keta lir. Item jagi tangar tai mapur saka kechi tajung aji repranga tenügsang agütsür. Iba jagi adianu aser medemertem rongnung teputep adoker. Shisa tajung aser temulung temerük nungi temeim adoker aser tangar asoshi tayari aser temoatsü angudak taküm ka akümer. Aji oda, Mathi tapu 6:22 nung Yisui asenok dang angatetdaksünüba o tongtibang kaji ,asenoki tangar dak tamajung ajitetra asenok pelaa malitsü aser iba mepelabaji tulu asütsü saka asenoki tangar dak tajung ajitetra asenok kanga pelaa alitsü ta shia lir. Aji oda, asenok libaliro nung asenok tamangertem asoshi tongtibang kaji, asenok temulungjang aser shisatsü merükmerüka alitsüba ya lir. Asenok shisatsü memerüki lira asenoki angashiba kecha nunga tajung mangatetsü aser shinga daka temulung malemtsü. Tanübo asenoki asenoksasa asenok mulungjang ken meyipa reprangdangdi. Asenoki tangar indang tamajung bilemer asü? Tangar dakbo tamajung-tamajung dang reprangtetter asü? Nai tangari inyakba mapa ajak nung aija anidaker asü? Iba ama shisatsü agi na mepelateti lira, tang nai Tsüngrem dang nü mulungjang, nü mulungsentsü aser nü shisatsü ajak merüktetjang ta shiang. Nai Tsüngrem nem nü mulungjang tejenbaji agüjang aser aji tasen temerük ka agi melenjang ta shiang. Nai ochi mulung agi, Tsüngrem dang shisatsü tajung adenba temulungjang temerük ka aginer ta shira, Pai nü nem iba temulugjang temerükji agütsütsü aser tanü nungi na pelaa alitsü. Ibaji na asoshi shi atema mozü tajungtiba aser tanüla asoshi tekümtet jenjang tulutiba angur asütsü.

OLEMSABANG

Taneptsü angudak lenmang balala

~ L. Kika Pongener

Asenok temang nung shiranga tim-atemba ya yimya balala agi tim-atermer, anungji aji aneptsü atema lenmang balala nungi teyari agitsüsa akümer. Nisung kar accident ajurua, mesura alanga yirua tetsüng-teben teret teloktep kar raksara, mesura tezu pelepa, atsüpetra....Teret raksa-a aliba aser tezu pelepa/atsüpetra alibaji ajetoka yangludaktsütsü atema 'Kopiraj' kar teyari nungdaktsü....Ano teretji kosuka lira ajibo Doctor teyari agia operation agitsüsa akümtsü. Ano nisung kar tashitak tamajung aser tashitak tulu kar agi shirangra, ajibo yakta Hospital-i orr Doctor teyari agia mozu achiba aser ajem agiba agi dang aneptsü. Ashiko, iba amala agi timtemashirangbaji lumia sarasademba kisung agi dangbo maneptsü. Ano nisung karbo Hospital aser Doctor aika dangi orr, tapu-tapu tendang-aka tashitak kecha meputeter, mozu aika chiaka taneptsü mangur, aser temang nungbo kanga dang tim-atermer ta karbo alitsü akok. Ashiko, iba amala timtema shirangbajibo asenoki asen temenen bushia, temenen nangzuka sarasademba agi dang taneptsü angutsü akok. Ashiko, tetsü-tebou temenen, mesura tsürabur temenen, mesura aseni Tsüngrem jashitsüsa aibelenba kar agi kangshir asütsü akok. Anungji ajibo 'Taneptsü Sempet' akar kar teyari ajanga Tsüngremi aneptsütsü akok. Atangji, asen temang shi nung tim-atemba aser shirangba ya lenmang balala nungi aneptsü akok. Anungji asenoki itemji kanga junga bendanga angateta inyaksü nungdaker.

Yisu alima nung alidang Yisu-i pa Ministry nung taneptsüba mapa (Healing) ya-a kanga tongtipang sua inyakba angur. Asenoki laishiba nungji kanga junga zungdangra, Yisu-i taneptsüba mapa inyakba ya yimya balala agi inyakba angur. Yisu-i zutsüra aketer nisung ka dak pa teka agi kongshir aneptsü (Mathi-8:3). Ano nukpoker ana daka tenuk nung kongshir aneptsü (Mathi-20:34). Ano Yisu-i togimra agi shirangba nisung ka dangbo"Ne menen tokogo" ta shir aneptsüba angur (Mark-2:4-5). Ano Yisu-i küm terana azu ayimba tetsür ka dangbo...."Ne tamang agi na aneptsüogo".... ta ashiba angur (Mathi-9:22). Ano Yisu-i nukpoker kabo ali nung metsü metsür (Saliva) lishi den mezuteper tenuk nung nuloktsür, Siloam tzutu nung oa shitokang ta ashiba angur (Yohan - 9:6-7). Atangji, Yisu-i taneptsüba mapa inyakba ya yimya balala agi aneptsüba asenoki tasen lai osangtajung pezu prongla nungji angur. Anungji asenoki Yisu-i taneptsüba mapa inyakba nungi lesson kar angubaji....Tashitak karbo pei tamang agi dang anepba, ano karbo temenen tatok agütsür aneptsüba aser ano karbo mozu yanglua nuloktsür aneptsüba angur....Yamaji Yisu-i taneptsüba mapa inyakba nungi asenoki lesson tejangja kar angur.

Aji oda, asenoki tashitak aneptsü atema Yisu-i inyakba mapatem nungi lesson kar nguogo. Anungji asenoki itemji kanga junga bendanga angateta inyaksüla. Asenoki itemji kanga junga mebendangteti inyakra, asenok temang nung tashitak karbo mela-mela aneptettsüba sernung, asenoki mashilen senzudang tamajungba-ang kümdaktsür tesasatsüka taneptsü mangutsü. Adianu tembar tajung karbo pa/la tashitak jagi yakta Hospital aser Doctor bushia aonungpo mela-mela aneptsüba sernung, mapang talangka lumia sarasadema senzür, taneptsü monguteti tesasatsü-ka arishi tempangba-a karbo alitsü akok. Atangji, asenoki mapang shitak nung Hospital aser Doctor dangi aotsüba tashitak sernung, aibelenba limapur Arasener (Saduwalla) kar dangi aoba, mesura 'Sarasadem Tesep' kar nung monga lumia sarasadema taneptsü bushia senzuba-a alitsü akok. Ano karbo tsürabur temenen, tetsü-tebuo temenen, mesura pei-i aibelenba temenen agi yareta tim-atemba-a lir.... Iba amalajibo temenen nangzuka lumia sarasademba agi dang aneptsü akok. Asenoki ibaji angateta bendanga inyaksüla.

Atangji, asen temang shi nung timtema shirangba ajakji lenmang balala nungi taneptsü angutsü....Kar Doctor teyari agia mozu aser ajem agiba agi aneptsü, kar Kopiraj teyari agi aneptsü aser ano karbo Tanela Sempet akar kar teyari ajanga aneptsü, ano karbo temenen nangzuka lumia sarasademba agi dang aneptsü....ta yimya balala agi aneptsü akok. Ano asenok atema tekümdangtsü kaji....Tanela sempet akar karibo mozu (Medicine)-a zulur agüja alitsü akok. Doctor-tem ya tashitak tendanga mozu amshitsü atema küm pongu-terok tashi 'MBBS Degree' azunger, aser ano küm asem-pezu tashi 'Specialist Degree' agir....Aji oda, küm paikaji agia zunger shiranger nem mozu ka agütsütsü kanga kümdanga dang agütsür, kechiyong iba nungji lendong keta lir....Anungji asenok 'Laymen' kati tapi-tapi agi mozu zulur magütsütsüla. Aji oda, asenoki Doctor mapa nungbo mekongshitsüla. Asenoki Tsüngremi asen nem agütsüba sempetji dang tamshi shia amshira....Asen tamang ajanga shiranger aser Tanela nung nungdakbapur aika taneptsü angutsü....Tanela-a aika anir arutsü aser Tsüngrem sentsü tali wangshidaktsütsü. Anungji asenoki Tsüngremi asen nem kechi sempet agütsü aji tang tamshi shia amshitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Lipok 12:3 Lai tekong ajanga ni Israel pusemer: Ted Cruz



Senator, Ted Cruz (abelen) aser Conservative commentator, Tucker Carlson na o entepba mapang tangokba noksa nung angur.

June 20, 2025: Conservative commentator, Tucker Carlson den interview ka nung jembidang Republican Texas Senator, Ted Cruz-i, Laishiba nung Israel moatsütsü atema shia lir, ta ashi. Tang Israel-i Hamas telok aser Iran den raraba mapang ka nung interview nungji jembidang Cruz-i, Laishiba nung shia alibatem nung ajemdaker pai Israel pusemer, ta ashi. Lipok 12:3 nung ajemdaker Cruz-i, "Khristan ka ama ni Sunday school-i oa intet aser Sunday school nung yamai sayua liasü- Israel moatsürtem Tsüngremi moatsütsü aser Israel atakatemeritem Tsüngremi atakatemtsü. Ni temoatsü angurtem tsütsü denner," ta ashi. Ibaji langzüka Carlson-i Cruz dang, "Israel sorkar moatsürtem na?" ta asüngdang. Ibaji langzüa Cruz-i, "Israel moatsürtem ta shia lir; sorkar moatsürtem masü, Israel kin, ta shia lir," ta metetdaksü. Cruz-isa, "Ni Yihuda kin pusembaji Laishiba nung ajemdaker inyaker. Israel pusemstsü atema Laishiba ajanga asenok dang tuyur," ta ashi. Tasüngdangba ka langzüdang Cruz-i, "Au, atangji nisung teimbakati Lipok kaket nung shia alibaji Tsüngremi shimtetba nüburtem, Yihuda nungur ta angateter," ta ashi.

UK nung 'assisted suicide' bill agizükba agi Khristantem jashir

June 21, 2025: Hokolbarnü UK nung MP temi Kim Leadbeater-i benokba assisted suicide bill atema vote agütsütepa iba bill agizükba agi Khristantem jashir. Terminally Ill Adults (End of Life) Bill ji vote tali 23 agi dang takok ngua liasü. MP 314-i iba bill pusema vote agütsü aser iba bill anema vote agütsür 291 liasü. House of Commons nung vote agütsütepa iba bill agizükogo; maneni iba bill reprangshitsü atema House of Lords dangi yoktsü. Hokolbarnü agizükba bill ji ajanga England aser Wales nung teimla makai shirangertem; ita trok mesüra iba dang nungjagi tajemba taküm alitsüpurtemi pei taküm tembangtsü atema temepishiba agütsütettsü. Iba bill agizükba sülen The Christian Institute nung Director, Ciarán Kelly-i, "MP temi meimchir ka taküm akhümket mezüngshiba ajanga Khristantem jashir," ta metetdaksü. "Ajisüaka asenoki maneni raratsüla. Asenoki maneni sarasademtsüla aser House of Lords nung iba bill jungjunga asadangtsü ta imlatsüla," ta pai metetdaksü. Iba bill atema o entepdang Kim Leadbeater-i MP tem dang, lai benokba bill ya mapang talangka shi nung timtema shirangertem dang aria bilemba sayutsü aser süadoktsü atema telemtetba agitsü asoshi temeden agütsütsü atema lir, ta ashi. Iba bill anema vote agütsür Conservative MP, Sir Edward Leigh-i, "Iba bill ya agizükra asenoki süadoktsü atema takhangba agütsütettsü," ta ashi. Labour MP Diane Abbott-i MP tem dang, "Ozüng tai agizükba ajanga pei taküm samatsü, temeden magütsübaji iba dak alia kechi ali?" ta asüngdang. Conservative MP Jeremy Wright-i, "Taneptsü manguba tashidak agi südaksüpurtem densema nisung ka takümji senti masü, ta angatetdaksütsü ajungshiba loktiliba ka nung ni meliner," ta ashi. Khristan lenirtem aser meimchir temeden atema inyakeritem aikati mapang talangka nungi iba bill anema ola adoka aruogo. CARE nungi CEO, Ross Hendry-i, "Assisted suicide agizüktsüsa vote agütsüba ya meimchir taküm ka akhümket atema takoksa tulu. Iba ozüng agizükba ajanga, tashidak tamajung agi shirangertem aser matamabensartem taküm alitsü metemsü, ta tangatetba ka agütsütsü. Azüngmeyaka aliba t a n t s ü r - t a m b u r t e m , matamabensartem aser kidang apuanii tashiyim amshia teka sangshiba ajanga takoksa angurtem temeden atema inyakeritembo iba ozüng agizükba ajanga kanga jashitsü," ta metetdaksü. Ross-isa, "Onoki maneni tangartem den longjemer iba Bill anema nokdaksü," ta ashi.

Indonesia nung Tenla ki tesüdak mapang Khristan ana khaset

June 21, 2025: Indonesia nung Tenla ki tesüdak mapang nung Khristan ana khaset, ta International Christian Concern (ICC)-i metetdaksü. Arrshi küm 45, Rahmat Hidayat aser Saepudin (39) naprongla West Java kübok Purwakarta, nungi liasü. June 4 nü Asotipo Dsitric kübok Kwantapo yimdak GKI Immanuel Church Tenla ki tesüdak mapang tena khaset. Tenük kuli alirtemi ashiba agi, anepdang 8:00 ako meta nisung ana prangpong amer aruba sülen tenaprongla dak injang khaloktsü. Saepudin tekolak injang agi yiru aser Rahmat tapubang yirua liasü. Idangyongjisa Khristan ana jagi ajentsü merang saka prangpong amertem jagi arishia oor maneni injang khalokja khaset. Cartenz Peace Operation lenir, Brigadier General Pol Dr. Faizal Ramadhani-i iba tatalokba aitsüogo aser ketdangsertemi aibelenertemji bushidar. Indonesia tesem ajaklen Muslim nungertemi par nütsüng teimba aliba kiyongtem aser yimtsüngtem nung Tenla ki tasen asüba anema nokdaker.

ANOGO ABEN TSÜNGREM DEN

SHISATSÜ SEMPAR ASÜ

"Kechiyong parnoki shisatsü sempa, aser KIBUBA tsübuba meshim." Apijemtsü 1:29 Alima nung asenoki nisung tajung, tamajung tapu balala aika angutsü. Samaro, tashi manga tanur ka dang sayu machi tanur ta ajar. Kechiba ta süra, pa jungdaktsütsü asoshi tajung sayu saka item nung pai tajung mechitet. Ibaji pai shisatsü sempaba kuli lir. Tsüngrem nungi anguba shisatsü asen dak melira alima shisatsü tashi temetetji tulu liaka item ajakji amajok. Shisa taka chuba Solomon otsü asenoki meteta lir. Ashiba agi ali pokli nungi tanü tashi nung Solomon ama shisa taka nisung kata soteta mali. Tsüngrem nungi anguba shisatsüji tanga shisatsü kecha dena medemdangtsü makok. Temeim adianutem, shir takümi Tsüngrem nungi anguba shisatsü sempar parnok dak kodanga Tsüngrem tsübuba shisatsü malitsü. Nisung dak keta aliba shisatsü tamajung tashi mait zünger mezüngma lir, itemji shisatsüji kong nungi arur, Tsüngrem nungi masü saka mojing nungi lir. Asenoki ken pei mulungjang bushidi, asen dak koba shisatsü lir ta shisadangdi. Kechiyong asenoki tebang agi ni Tsüngrem meimer ta jembiaka asen dak aliba shisatsü nungi adokba mapa agi aji memedentsüra item ajakji tiyazü dang asütsü. Kibuba matsüngdang tiyazü takümji aiatai? Kechiyong item purtemji tatishitsü masü saka tansütsü taküm dang akümstsü. Nicaragua nung Pastor kati tepuokdak reshikangshiba lemsatep **June 21, 2025:** 2023 küm Sandinista National Liberation December ita tatembanglen Front (SNLF) nung Nicaragua nung Pastor Jose züngsemtemi, Khristantem Luis Orozco Urrutia anema sentongji linük atema ken o benokba mapang nungi amokmeren lir, ta tai tenzüka pai timtem aika tongloksü. Nicaragua nung SNLF-i pei tebilemba jembiba temeden aser tamangba yimsü temeden anema inyakba atema Khristan lenirtemi aitsür. Gateway ministry nung Pastor Jose Urrutia-i, pa ita sendaktepa aliba Pastor Jose 9 tashi tepuokdak aliba den tangar 12 anema ken o mapangji pa tamang ainba aser benokba mapang nungi parnok Tsüngrem dak dang metalokba timtem ajangshia aru. mapang ka liasü, ta ashi. 2024 küm March 19 nü La Modelo jail nung Fifth District Criminal Court-i Mountain Gateway pastor tem pastor Jose küm 12 tepuokdak aser staff tem nem tzü ayutsü obendang agütsü aser temenen agütsü aser pa dang senchi dollar sen chiyungtsü tamajung agüja million 80 achi. Tangar liasü; iba dak alia kinüngertem Khristan lenirtemji küm aika ajurutsü memela mesüra tepuokdak ayutsü obendang Laishiba-a memela, ta pai agütsüba den külemi senchi metetdaksü. aika achi. Ajisüaka parnoki jail nung Parnok atema ken o lumia sarasadem aser jail nung jembirtsür lawyer temji parnok alir mamangertem den Khrista den ajuruteptsü atema osangtajung lemsatep. Pastor temelaba magütsür. karibo police officers kar Nicaragua nung 250,000 Khrista dangi anir aru. shi Mountain Gateway-i Tesüsa jail kümsük ayongzüka tekülem sentong matongdang Mountain ka nung adenba sülen Gateway nung pastor tem aser ketdangsertemi lenirtemji apu. staff temji jail nung puoka alir Tir Daniel Ortega-i aniba 124 den külemi chioka liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tepeletdak**

(adj) ain yakta adokba, mit tejokjok (hot tempered)

* Mit tepeletdak nisung den o anükanüka jembitsüla.

Tepeletdak

(adj) lungrenbang, tetsüng ajemetdak mesadem (very narrow passage)

* Nisung tain kümerbo tepeletdak lenmang nung mejajatsüla.



Tir Yimyim

OLONG PAITEP # 7187

1		2		3		4	5			
				6						7
		8								
9				10		11				
			12					13		
						14				
16						17				

TIPLÉN

- Nisung jenti - (5)
- Tsük rudenba - (5)
- Temzüng tesashi - (5)
- S _ _ _ i - (3)
- Nisung telemsa - (3)
- Anogoshi - (4)
- Ajanga aor - (4)
- Tsük rizüngdak - (3)
- Tebang nungi adokba - (3)
- Süngdong tatembangtiba - (5)
- Meputep - (5)

LANGTSÜNGLEN

- Tenük telong - (9)
- Committee dang ajar - (5)
- Yagi ki okdoker - (7)
- Yim lenmang - (5)
- Temoatsü keter meyipa aruba - (9)
- Kanga junga menemba - (7)
- Majinü - (5)
- Tzüma nung senzüba - (5)

OLONG PAITEP # 7186 TELANGZÜBA**TIPLÉN :**

- Telok, 4. Aluru, 6. Ozüng, 8. Emk,
- Kin, 10. Teti, 12. Süir, 13. Jen,
- Ola, 15. Umten, 16. Talak,
- Mazük.

LANGTSÜNGLEN :

- Tenükjang, 2. Luden, 3. Kioktsü,
- Lendi, 7. Tajanzük,
- Teronem, 12. Sempa,
- Jahaz.

NAI-A YA METETTER MA

India aser England na tang asaya aliba Test asaya nung Rishabh Pant-i Honibarnü (June 21) Mahendra Singh Dhoni-i yanglur aliba record ka ajateta pa ya India nung wicketkeeper-batter tem rongnung century timba yangluba asayar kümogo. Dohni-i 2005 nungi 2014 tashi nung Test 90 asaya aser iba mapang century trok yanglua liasü. Kasa mapang nung Pant shiba tang Leeds nung India tenüng nungi Test 44buba nung asayadar pai Honibarnü yangluba century densema century tenet yangluogo. Pant shiba India tenüng nungi Test asaya mezüngbuba 2018 küm August ita 12 nü England den Nottingham nung asaya liasü, pai century tenet yanglur aliba nungi asembo England den England nung asayaba mapang yanglua liasü.

Assam-i BSF constable ka nem Bir Chilarai Award agütsü

**Constable
Deepak Chingakham**

Guwahati, Aami/June 21 (Agencies): Assam sorkari Hokolbarnü asür Constable Deepak Chingakham nem Bir Chilarai Award agütsügo.

Chingakham ya Manipur nung alir ka aser pa taoba ita Jammu and Kashmir nung duty nung aliba mapang tepeta liasü.

State sorkari Nalbari ming

central 'Rabha Divas' sentong agiba mapang Chingakham nem iba tetushi agüja liasü. Rabha Divas' ya Assam nung sobaliba icon, 'Kalaguru' Bishnu Prasad Rabha asüba anogo amunger.

Sentong nung o jembiba mapang Assam Chief Minister Himanta Biswa Sarma-i, Bishnu Prasad Rabha taküm aser mapa agi Assam nungertem maneni ajungmesor, ta ashi.

"Pa ken aser sangrotem agi tanüa lanurtem maneni ajungmesor," ta Sarma-isa shisem.

Chief Minister-isa, Rabha-i, scientific tsütsülen nungi sobaliba ajanga lokti libaliro medema amenoktsü Rabha nükla liasü, ta ashiba den pai Assam asoshi teyari tulu

agütsüba bilemtetshia jembia liasü.

Sentong nung Chief Minister-i, 2025 atema Bishnu Prasad Rabha Award ya nüngtugu artiste Narendra Nath Das aser nüngtugu tsüngsanger Mallika Kandali na nem agütsü, 2025 atema national-level Madhavdev Award Sanskrit Scholar Thaneswar Sarma nem agütsü aser Kalicharan Brahma Award ya Dhaneswar Ingti nem agüja liasü.

Maneni Chief Minister-i, 2024 atem state-level Sonit Konwar Gajen Barua Award ya nüngtugu Satriya exponent Sonaram Sarma Buhrahakat nem agütsü aser Swargadeo Sarbananda Singh Award, social worker Jagyeswar Chetia nem agüja liasü.

Tripura Police-i sen lakh 5.5 alang heroin apu

Agartala, Aami/June 21 (Agencies): Tripura Police-i Honibarnü North District nung Dharmanagar railway station anasa arishi küm 23 tain lanur ka apu aser pa ket nungi sen lakh 5.5 alang heroin nguteta liasü.

Police-i ashiba agi, aija alisang ya Salman Hossain ta jangjaogo, shiba Bhagyapur Gram Panchayat kübok Ward No. 2 nung alir.

Itangitertemi osang agütsüba sülen meita aoba mapang pa ya

Honibar anepdang 11 ako meta pua liasü.

SDPO B. Zorinpuia aser Officer-in-Charge Smriti Kanta Bardhan nati anir team kati Dharmanagar Municipal Council kübok railway station temeket ya meita aoba mapang iba nisungba ya pua liasü.

Meita aoba mapang soap bongdang pongu nung heroin sepa bener aliba Hossain indang yangku nung nguteta liasü. Heroin ya ajak senteper gram 55 shi liasü.

Temeseppa mozü apuba sülen Deputy Collector Magistrate (DCM) densema ketdangsur tejentem aser forensic team ka iba tesem tonga ao aser kuli kaket achaayangba aser bushisüngdang nung teyari agüja liasü.

Ken o dak sendakba nung Narcotic Drugs and Psychotropic Substances (NDPS) Act kübok ken o ka benokogo aser maneni bushisüngdangdar.

Assam CM-i Kajalgaon nung tepuokdak ka semzüksüogo

Guwahati, Aami/June 21 (Agencies): Assam Chief Minister Himanta Biswa Sarma-i, Chirang district kübok Kajalgaon tesem nung tawa yangluba district jail semzüksüogo. Iba tepuokdak ya Northeast India nung mezüngbuba fully modern correctional facility ta züngshir.

Iba tepuokdak ya rehabilitation aser humane treatment dak rangloker yangluba lir aser iba ajanga Assam indang correctional infrastructure renloka aoba sayur.

Iba tepuokdak state-of-the-art amenities aser inclusive

system tem keta lir, kong aitsür alir aser ken o tebandangdak aliba tepuoker 636 yutettsü.


NE nung tanga tepuokdak ama masü Chirang District Jail nung health aser merekmeju kanga junga anepalutsü atema quarantine asütsüba tesem ka yanglua lir. Iba tepuokdak ya temerenshi atema dang masü saka temelenshi aser rehabilitation dak rangloker yangluba lir.

Tepuokdak tetsür aser tebur tepuokertem atema modern healthcare unit balala, educational classroom tem aser library keta lir, koba

tepuokertem terenlok asoshi aser parnok chiokba sülen lokti nung tanaben libaliroa yoktsü atema renemtsütsü asoshi lir.

Tepuokdak semzüksüba sentong nung CM Sarma-i ashiba agi, correctional institutions tem jenjang ajungketa tepuokertem ajangzükdaktsütsü aser rehabilitation atema item ya national aser international jenjang nung yanglutsütsü sorkar bendanga agütsür lir. "Iba facility ya tepuokdak ka dang masü; iba ya temelenshi adokdaktsütsü atema centre ka lir," ta pai ashi.

Civilian nuclear technology programme yanglutsü Iran temeden lir: Putin



Russia Tir, Vladimir Putin

St. Petersburg, Aami/June 21 (Agencies): Iran aser Israel tsüngta tensa tamajungba akumba mapang Russia Tir Vladimir Putin-i civilian nüngdak atema Tehran dak nuclear technology yanglutsü temeden lir ta tebu kuma jemb i aser iba linüki atomic weapons yangluba kuli mali, ta ashi.

"Yimjung maparen asoshi Iran-i nuclear technology programmes inyaksü temeden lir," ta Putin-i St. Petersburg International Economic Forum (SPIEF) indang senden amenba sülen osangbener dang ashi.

Putin-isa Iran indang civilian nuclear energy yangluba nung maneni yaritsü Russia-i mulunga lir ta ashi. "Tesüiba mapang ama 'peaceful nuclear energy yangluba nung nüngdakba nung Iran yaritsü Russia renema lir."

International Atomic Energy Agency (IAEA) den putepa Russia tiria, "Iran-i nuclear nok-nü yanglutsü mebushir ta aiben sangdonga lir. IAEA-ia nuclear nok-nü yangluba kuli mongutet," ta ashi.

"IAEA ama, Iran-i nuclear nok-nü yanglutsü renemer ta sayutetba Russia ket nunga kuli maka, aser kodanga meliasü," ta pai ashi.

Iba tangatetba Israel nem metetdaksüogo ta Putin-i ashi.

Iran indang nuclear sentong dak sendakba nung tang mepetmesü adoka aliba ya linük anaprong densema jembishinüa angatetteptsüla, ta pai ashi.

"Ni angatetba agi, jembishinüa angatetteptsü onük

tejangja lir. Iran aser Israel linük anaprongi jembishinüba nung shilem agitsüla," ta ashi.

"Israel asoshi tebilemtsü khuret lira, parnoki aji angatetteptsüla. Itemji angatetteptsü asoshi yimya balala lir ta nibo angateter," ta Russia tiri ashi.

US Tir Donald Trump-i nuclear mangatettep benteta America nunger nem memakdaksütsü asoshi par administration-i Iran nem hopta ana agütsür ta ashi.

Anogo ana tejakdang June 19 nü White House Press Secretary Karoline Leavitt-i tiri züluba sangdong ka zünga liasü, kong Iran nuclear ken o nung tangatettep arutsü maongka Trump-i angur ta shia liasü. US-i mitkar amshia mapa inyaksü telemtetba ya hopta ana tsüngta agitsü, ta sangdong nung ashi.

Honibarnü agi anogo toku buba Tehran aser Tel Aviv tsüngta mepetmesü adoka lia Putin-i iba o ya ashi. Iba rara ya June 13 nü tenzüka Israel-i tayimtsü amshia Iranian nuclear aser military facilities amak, aser iba sülen Iran-ia Israel dak missile khaloktsü.

Iba sülen maneni kati ka dak tayang kepzüktepa amaker aser nisung asüba aser yiruba lir. Iranian Health Ministry ajanga ashiba agi, Israel-i tayimtsü amshia amakba nung nisung 430 tepsetogo aser 3,500 yiruogo.

Kasa mapang Israel indang defence minister-i Islamic Republic den mapang talangka raratsü ta tekum dangtsü shir

ghonda ishika lir Iran-i ozü linük maka alidang nuclear sentong indang jembishinü metenzüchtsü ta ashi.

Hokulbarnü Foreign Minister Abbas Araghchi-i Geneva nung European diplomats tem ajuru aser parnoki pa dang par linük indang nuclear sentong asoshi US den asendenshir jembishinütsü ajungshia liasü.

Israel army indang chief of staff Eyal Zamir-i video ka nung par linük mapang talangka raratsü asoshi renema alitsüla ta ashi.

Iran-i central Israel tsütsü missiles khaloktsüba sülen Israel mitkari Iranian missile storage aser launch sites nung amakba sangdonga liasü.

Tel Aviv anasa apokba ola angashiogo aser iba yimti anünglen missile khazüka yokba angu. Missile khazüka yokba teraksa tsüka central Israel nung ki ka nung mi adok ta osangtem ajanga ashir.

Kasa mapang Israel-i Tehran south tsütsü Qom yimti amakdang arishi küm 16 tain ka tepset aser ana yiru, ta Iranian state media ajanga Honibarnep ashi.

Isfahan yimti nung aliba nuclear facility ka nung Israel-i maneni amak ta parnoki ashi.

Israel-i tashiyim amshiba anenba sülen ang Iran-i yimjung asoshi jembishinütsü renema lir, ta Araghchi-i Houlbarnü ashi.

Iran indang nuclear programme ya yimjung asoshi lir aser Israel-i amakba ya international law nung aibelenba lir, ta pai nenshia ashi.

Pei sasa pei kumzüka ayutsü asoshi Iran-i tejangja temeden maneni amshitsü, ta pai ashi.

Araghchi ya hopta tatemi Istanbul nung Arab League nungi teshimtet ketdangsürtem den ano senden amentsüba lir.

Israel indang UN ambassador-i Iran dak "genocidal agenda" lir aser timtem lir ta tai tongloktsü, aser Israel-i par nuclear facilities meraksatsü tashi amakba manentsü ta ashi.



OFFICE OF THE
LANGPANGKONG TZÜKONG MUNGDANG
H.Q. Chuchuyimlang – 798614
Dist. Mokochung, Nagaland.
ESTD, 1933

Ref. No. *TMA/Est/1933/65/ps*

Dated: *19/06/25*

TENÜNGSANG AGÜTSÜR

Wb. ALIAWATI LONGKÜMER IFS, Yaongyimsen Late Er N.Tsükti Longkümer aser Late Wt. Thejano tena jabaso tang Embassy of India Asuncion, Paraguay Yimtiba nung Charge d'Affaires teiyakdak lir, pa Democratic People's Republic of Korea Ambassador aotsü asoshi India Sorkari shim nung Tsüngrem tenüng sanga pa nem Aküm tetushi agütsür.

Pa Ambassador shimba ajanga Linuk ana India aser Democratic People's Republic of Korea tsüngda nung tesendaktep tajungtiba yangluba den Yimjung nung alitsü aser Linük ana Nüburtem dangi yimchiyimjung bener arutstsüsa inyaktettsü pa sempet aser tashi temetet akaba ama tamang teimla tulur akar.

Anungji Pa wadang nung Tsüngremi ano takok tulu moajangma ta Langpangkong Tzükong Mungdang (LTM) sanger sarasadem.

Sd:/



(N WATITOSHI)
TIR LTM



(MOATOSHI IMSONG)
REPSEM ZULUR LTM

Pakistan-i Nobel Peace Prize atema Trump tenüng agütsütsü

Islamabad, Aami/June 21

(Agencies): Pakistan-i Nobel Peace Prize atema United States Tir Donald Trump tenüng agütsütsü ta ashir, koba pai kanga aginür ta shia lir.

Nuclear nok-nü aliba tsükchir linük ana, India aser Pakistan tsüngta anogo pezü raraba kanga kera tembangtsü asoshi May ita nung Trump-i ceasefire ka sangdonga liasü.

Iba sülen Trump-i nuclear war ka nungi jenbudaktsüogo, nisung million aika takum kumzükogo aser iba atema pa nem tenüngsang magütsür ta mapang shia jembia aru.

Iba rara tembangba nung US shilem lir ta Pakistan-i agizüker, saka India-ibo ibai linük ana kisüng mitkar tsüngta mulungtepba lir ta ashir.

"Tir Trump-i pa dak nükla tajung aliba tasa sayua Islamabad aser New Delhi den kanga junga jembishinü, aser ibaji ajanga kanga kera tensa mejungi kuma aliba ajemdaktsü," ta Islamabad-i X nung sangdong ka agütsü.

"Pai iba ama tetsüngtai aitba ya shidakba yimjung yanglur aser jembishinü ajanga mepetmesü angatetteptsü asoshi bendanga agütsür inyaker ka ta kuli sayur."

Nobel Peace Prize atema sorkar temi tenüng agütsütsü akok. Tang tashi Washington, DC mesüra New Delhi nungi tangzüba kecha mali.

Iba mera ya ajanga Trump-i Israel-i Iran indang nuclear facilities nung amakba nung Israel den adentsü bilema aliba indang shisadangtsü akok, ta Pakistan nung analysts temi ashir. Israel inyakyim ya international law nung aibelenba aser region tensa mejungi kumdaktsür, ta

Pakistan-i aija lir.

Hokulbarnü Trump-i social media post ka nung pai angatetteptsüba rara aika indang shia liasü aser yangji India aser Palkistan aser pa mezüng kümsük mapang Israel aser Muslim nunger timba aliba linüktem tsüngta Abraham Accords yangluba indang shia lir.

"Ni komarka inyakyonga ni Nobel Peace Prize mangutsü," ta pai ashi.

Mangatettep aliba Kashmir region mechi India aser Pakistan tetsüngtai aitsü mulunga lir ta Trump-i aiben shia lir. Mapang talangka nungi Kashmir nung temulung agütsütsü linük balala dang ajungshia aruba Islamabad yangji pelar.

Ajisüaka pa tangatetba yagi South Asia nung US policy nung tetsükdaktsü agütsür, kechiaser Washington-i China den tokteptsü asoshi India bhukumer aser taoba mapang Trump aser India Ato Kilonser Narendra Modi tsüngta tesendaktep tajung aliba nung tasüngdangba arur.

Pakistan army tekolakba, Field Marshal Asim Munir-i US tir den ajurutepba kasa hopta nung Pakistan-i Trump tenüng agütsütsü osang ya sangdonger. Islamabad nung civilian sorkar lia White House-i Pakistan mitkar lenir jaokba ibai mezügbuba alitsü.

Canada nung G7 summit mapang Trump-i Modi den ajuruteptsü sentong liasü, saka US tir jelia aoba yong matalok, saka tena phone ajanga jemb i aser iba mapang, Pakistan den mangatettep nung tetsüngtai aitba India-i magizüker aser kodanga magizüchtsü, ta Modi-i shia liasü.

Gaza City nung aliba Rimal kiyong nung chiyongtsü talem agütsüdak tesem ka nung yasenta aliba Palestine nungertem chiyongtsü abeni arua aliba noksa nung angur. October 2023 nung rara tenzüker tang tashinung Israel-i Gaza nung Palestine nunger 55,908 tepsetogo aser 131,138 yirutsür lir.

Neeraj Chopra-i Paris Diamond League kokogo



Neeraj Chopra

Aami/June 21, 2025

(Agencies): Hokolbarnü Paris nung Neeraj Chopra-i kanga junga asaya-a küm ana sülen mezüngbuba Diamond League title ka benogo. Pai Germany nung Julian Weber ajateta liasü.

India nung nüngtugu javelin asayar yagi nület mezüngbuba atsüba mapang 88.16m tsüteta pai iba asayamung akok. Pai nület tanabenbuba atsüba 85.10m dang tongtet aser iba sülen asemben foul mena. Tatembangbuba aser

trokbenbuba nület atsüba mapang pai 82.89m tsüteta liasü.

Neeraj sülen tanabuba jenjang nung Weber liasü, shiba nület mezüngbuba atsüba mapang 87.88m tsüteta liasü. Tasembuba jenjang nung Brazil nung Luiz Mauricio Da Silva liasü, shiba nület tanebenbuba atsüba mapang 86.62m tsüteta liasü.

Chopra-i tawa Doha Diamond League nung nület 90.23m tsüteta 90m mark aden, saka iba asaya nung pa tanabuba jenjang nungang

tembanga liasü. Doha nung Weber-i tatembangbuba round nung nület 91.06m tsüteta gold medal angu.

Weber-isa, Poland nung Janusz Kusocinski Memorial meet asayaba mapang Chopra kokogo. Iba asaya nung Germany nung asayar yagi nület 86.12m atsü aser Chopra-i nület 84.14m tsüa silver medal angu.

Chopra-i Diamond League title tatembangbuba ya 2023 küm June ita Lausanne nung koker liasü. Iba sülen pai Diamond League asayamung trok nung silver medal nguogo.

Paris Diamond League nunga Arshad Nadeem masaya.

Paris Diamond League result:

Neeraj Chopra: 88.16m

Julian Weber: 87.88m

Luiz Mauricio da Silva: 86.62m

Keshorn Walcott: 81.66m

Anderson Peters: 80.29m

Julius Yego: 80.26m

Andrian Mardare: 76.66m

Remi Rougetet: 70.37m

Küm ti sülen Neeraj taküm mezüngbuba Paris Diamond League nung asayaogo. Paris leg ya Diamond League asayamung 15 asayatsü aliba nung tibuba liasü aser league tatembangbuba ya August ita Zurich nung asayatsü.

South Korea nung club temi bendanger goalkeeper alizüktettsü

Aami/June 21, 2025

(Agencies): South Korea nung World Cup ayongzüka masaya tsüingda küm asem lia 1999 küm linük nung club tem nem bendanger goalkeeper malizükttsü tenokdangba agüja liasü. Linük nungi goalkeeper tem aika anitettsü nükjidong nung iba jenjang agia liasü.

Ajisüaka küm 26 lir iba telemtetba ya melenshiogo.

2026 season nungi tenzüka K-League club tem nem bendanger goalkeeper alizükttsü temelaba agütsüogo. K League United website ajanga ashiba agi, specialised position atema tenokdangba agütsüba ajanga liromedem ka makai taah kanga aika kuma ajungketer. Ibayongji ajak nem taah liromedema agütsütsü asoshi iba tenokdangba agütsür aliba ya agütsüa aküm.

Iba telemtetba ya Brehostibarnü board senden ka amemba mapang agi, ta league-i metetdaksü. "Board-i ashiba agi, bendangertem goalkeeper, koba specialised position ka lir, iba atema züngoksemttsü memelaba ajanga tanga asayartem dang nungi domestic goalkeeper tem taah kanga aika akümba parnoki asadangogo," ta kasa sangdong ajanga metetdaksü.

"Bendangertem goalkeeper nem tenokdangba agütsüba mapang den medemdangra tang club timba kümogo, anungji bendanger goalkeeper tem asayatsü melayonga domestic goalkeeper tema asayatsü asoshi maongka angutsü. Anungji 2026 küm nungi K-League-i, goalkeeper ya domestic asayar asütsüla ta K-League indang competition guidelines nung shia aliba ya agütsü, koba K-League 1 aser K-League 2 naprongla atema asütsü."

1999 küm bendanger goalkeeper tem manisemtsü atema tenokdangba agütsüba mapang South Korean league nung team ti liasü. Iba mapang domestic keeper tem asayatsü maongka peria manguba ajanga iba jenjang ya agia liasü.

South Korea indang K-League 1 nung team 12 lir aser second tier-a 2013 küm tenzükogo. Division anaprongla nungi club tem nem bendanger keeper tem alitsü atema temelaba agütsüogo.

Tawa Iraq den FIFA World Cup qualification asayaba mapang South Korea team nung goal keeper asemprongla- Kim Seung-gyu, Kim Dong-heon aser Lee Chang-geun- ya domestic league nung asayar liasü.

Forest coach Nuno-i küm asem atema tenangzüktepba yanglushi

Aami/June 21, 2025

(Agencies): Nottingham Forest coach Nuno Espirito Santo-i club den ano küm asem atema tenangzüktepba yanglushiogo.

Iba Portugal nung coach lenisüba nung Forest pur taoba Premier League nung tenetbuba nung tembang aser 1995-1996 küm sülen tang mezüngbuba Europe nung asayamung atema qualify süogo.

"Iba football club nung maneni inyaksü atema maongka anguba atema ni kanga pelar," ta Nuno-i ashi.

"Onok Forest-i aruba sülen onoki asayartem, fan tem aser club dak sendaka alir ajak den tesendaktep tajung ka ayutsü atema meranga inyakogo aser iba ajanga onoki taoba season aika ajangzüktetogo," ta paisha shisem.

Nuno-i 2023 küm December ita Steve Cooper melen aser Forest pur 2023-24 season nung relegated mesüdaksü ania liasü.

Parnok profit aser sustainability temzüng ozüng nung aibelenba atema point pezü akoksaka parnok 17buba nung tembanga liasü.

Taoba season Forest pur ya ajaki mimlai lia kanga junga



Nuno Espirito

asayaba cluba ka liasü aser parnoki Champions League nung jenjang ka atema kanga toktepaba asaya aser season nung mapang timbaka parnok top four nung dang liasü.

League nung tatembangbuba asaya tenet nung ana dang akokba sülen parnok CL atema qualify mesütet, saka Europa Conference League play-off stage atemabo qualify süogo.

Taoba Wolves aser Tottenham head coach Nuno lenisüba nung Forest pur taoba season FA Cup semi-finals-i saka goal 2-0 agi Manchester City makok. Parnok 1991 küm sülen taoba season mezüngbuba FA Cup semi-finals asaya liasü.

Forest kibur Evangelos Marinakis-i, "Nuno-i temelenshi tulu bener arutsüogo aser tang tashi onok den kanga junga inyaka arudar," ta ashi.

"Pai asayartem pei dak aketba sempet tajungtiba amshitsü atema ajungmesotetba sayuogo aser asayartem renloka yoktsü atema pa mongin lir.

"Onok tesendaktep kanga junga lir aser ajak dang tongtubangbaji onok nükjidong ka dang lir, koba Nottingham Forest atema otsü tasen ka yanglutsüba, Premier League aser Europe nung maneni asayatsüba aser iba club atema takok marok koktsütsüba lir," ta paisha ashi.

PFA Player of the Year nominations nung Mohamed Salah lir

Manchester, Aami/June 21

(Agencies): Hokulbarnü Professional Footballers' Association Men's Player of the Year award atema asayar trok nominate süa aliba rongnung Liverpool forward Mohamed Salah dena lir.

Taoba season nung Liverpool-i Premier League akokba nung arishi küm 33 tain Salah-i tongti shilem agia goals 29 agütsü aser assists 18 agüja liasü.

Footballer Writers' Association-i Footballer of the Year atema vote agütsüba nung Egypt nung football asayar mongin yagi votes shilem 90 jungnüa ngua liasü, koba iba century nung takok anguba tetsüngta tulutiba alitsü aser PFA award angutsü teimla lir.

Iba nomination nung Salah den külemi ano Liverpool nungi külem asayar Alexis Mac Allister, Arsenal nungi Declan Rice, Chelsea nungi Cole Palmer, Newcastle striker Alexander Isak aser Manchester United midfielder

Bruno Fernandes nungertem lir.

2023-24 season nung PFA Young Player of the Year award angusang Palmer nominate asüba ya taoksatsüka lir, kechiaser taoba season nung pa Chelsea nung imlaba ama masayatet.

Arsenal asoshi midfield nung Rice-i kanga junga asayateta competitions balala 52 nung asayadang goal toku agütsü aser assists 10 agüja liasü.

Swedish striker Isak-i Newcastle asoshi goal 23 agüja Champions League atema qualify asüba nung yari aser küm 56 trophy agi anünga aliba tembanga League Cup takok ngua liasü.

1973-74 sülen Manchester United asoshi top-flight campaign tamajungtiba asayatetba nung teimla tajung aliba asayar ishika rongnung Fernandes ya ka liasü, shibai league goal ti aser assists 10 agüja liasü.

Taküm iba sempet agütsüba sentong ya Manchester nung August 19 nü alitsü.

BILEMDANGANG

"Takok tamakok ajakji taküm nung shilem ka lir."